



ერთის მხრივ, საქართველოსა და მეორეს მხრივ, ევროკავშირს და ევროპის  
ატომური ენერჯის გაერთიანებას და მათ წევრ სახელმწიფოებს შორის  
ასოცირების შესახებ შეთანხმებისა და საქართველოსა და ევროკავშირს შორის  
ასოცირების დღის წესრიგის განხორციელების

2017 წლის ეროვნული სამოქმედო გეგმის პროექტის  
შესრულების ნახევარი წლის ანგარიში

აგვისტო

2017

## სარჩევი

1.	ზოგადი მიმოხილვა.....	3
2.	პოლიტიკური დიალოგი და რეფორმა, თანამშრომლობა საგარეო და უსაფრთხოების პოლიტიკის სფეროში .....	5
3.	თავისუფლება, უსაფრთხოება და მართლმსაჯულება.....	13
4.	ვაჭრობა და ვაჭრობასთან დაკავშირებული საკითხები .....	17
5.	ეკონომიკური თანამშრომლობა.....	21
6.	თანამშრომლობის სხვა სფეროები.....	23
7.	ფინანსური დახმარება, თაღლითობის წინააღმდეგ ბრძოლა და კონტროლი .....	30
8.	ინსტიტუციური თანამშრომლობა .....	31

## 1. ზოგადი მიმოხილვა

ანგარიშში წარმოდგენილია ინფორმაცია ერთის მხრივ, საქართველოსა და მეორეს მხრივ, ევროკავშირს და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ შეთანხმებისა და საქართველოსა და ევროკავშირს შორის ასოცირების დღის წესრიგის განხორციელების 2017 წლის ეროვნული სამოქმედო გეგმის პროექტის შესრულების შესახებ.<sup>1</sup> წინამდებარე ანგარიში მოიცავს 2017 წლის პირველი იანვრიდან 2017 წლის 30 ივნისის ჩათვლით პერიოდს.<sup>2</sup>

2017 წლის პირველ ნახევარში, ასოცირების შესახებ შეთანხმებისა და ასოცირების დღის წესრიგის განხორციელების ხელშეწყობისა და საქართველოს ევროკავშირში ინტეგრაციის პროცესის ეფექტიანი კოორდინაციის მიზნით, საქართველოს პრემიერ-მინისტრის თავმჯდომარეობით გაიმართა საქართველოს ევროკავშირში ინტეგრაციის კომისიის ერთი სხდომა.

2017 წლის 28 მარტიდან ძალაში შევიდა ევროკავშირის/შენგენის ზონის ქვეყნებთან უვიზო მიმოსვლა, ხოლო 2017 წლის მაისში, საქართველო გახდა „ენერგეტიკული გაერთიანების“ სრულყოფილებიანი წევრი.

2017 წლის პირველ ნახევარში, საქართველოს კანონმდებლობის ევროკავშირის კანონმდებლობასთან აპროქსიმაციის მიზნით, საქართველოს პარლამენტის მიერ მიღებულია 2 ახალი კანონი და 30-მდე საკანონმდებლო ცვლილება. საქართველოს მთავრობის მიერ დამტკიცდა 15 კანონქვემდებარე ნორმატიული აქტი.

2017 წლის 7-8 ივნისს, კონფერენციაზე „სამართლებრივი დაახლოების პარადიგმა საქართველო-ევროკავშირის ასოცირების შეთანხმების ფონზე“ გაიმართა საერთაშორისო ექსპერტების ჩართულობით შემუშავებული საქართველოს კანონმდებლობის ევროკავშირის სამართალთან დაახლოების სახელმძღვანელოს პრეზენტაცია.

2017 წლიდან, სატესტო რეჟიმში ფუნქციონირებს ასოცირების შესახებ შეთანხმებისა და ასოცირების დღის წესრიგის განხორციელების მონიტორინგის ელექტრონული პროგრამა და შესაბამისი ინტერნეტ პორტალი (aa-monitoring.ge).

2017 წლის პირველ ნახევარში, ქართული მხარის წარმომადგენლებმა მონაწილეობა მიიღეს „ადმოსავლეთ პარტნიორობის“ ფარგლებში გამართულ 30-მდე სხვადასხვა ტიპის ღონისძიებაში (პლატფორმებისა და პანელის შეხვედრები, სემინარები, ვორქშოპები, მინისტერიალი, კონფერენცია და სხვა).

<sup>1</sup> სამოქმედო გეგმა საქართველოს მთავრობის მიერ ოფიციალურად დამტკიცდება საქართველო-ევროკავშირის ასოცირების დღის წესრიგის ტექსტზე ევროპულ მხარესთან კონსულტაციების დასრულების შემდეგ.

<sup>2</sup> წარმოდგენილი ინფორმაციის ნაწილი სცილდება საანგარიშო პერიოდს.

საქართველოს მთავრობა აქტიურად თანამშრომლობს სამოქალაქო საზოგადოების წარმომადგენლებთან, რომლებიც ჩართულნი არიან საქართველო-ევროკავშირის ასოცირების შეთანხმებისა და ასოცირების დღის წესრიგის განხორციელების ეროვნული სამოქმედო გეგმის შემუშავებისა და მისი შესრულების მონიტორინგის პროცესში.

2017 წლის პირველ ნახევარში, ასოცირების შესახებ შეთანხმებისა და ასოცირების დღის წესრიგის ეფექტიანი განხორციელების ხელშეწყობის მიზნით, **საჯარო მოხელეებისათვის ჩატარდა 100-ზე მეტი ტრენინგი და სემინარი**. ასევე, გამოცდილების გაზიარების მიზნით, განხორციელდა სასწავლო ვიზიტები ევროკავშირის წევრ და კანდიდატ ქვეყნებში.

**2017 წელს, საქართველოს მთავრობამ დაამტკიცა ევროკავშირისა და ნატოში საქართველოს გაწევრიანების კომუნიკაციის შესახებ საქართველოს მთავრობის სტრატეგია 2017-2020 წლებისთვის.**

ევროპულ და ევროატლანტიკურ სტრუქტურებში ინტეგრაციის საკითხებში საქართველოს სახელმწიფო მინისტრის აპარატის კოორდინაციით დაიგეგმა და **თებერვალში დაიწყო ევროკავშირთან სავიზო რეჟიმის ლიბერალიზაციის საკითხებზე საინფორმაციო კამპანიის მეორე ფაზა**, რომელიც მიზნად ისახავს საქართველოს მოქალაქეების ცნობიერების ამაღლებას უვიზო რეჟიმის პირობებში მათი უფლებებისა და მოვალეობის შესახებ.

ევროინტეგრაციის პროცესისა და ევროკავშირთან ასოცირების შესახებ შეთანხმებით გათვალისწინებული რეფორმების თაობაზე საზოგადოების ინფორმირების მიზნით, განსაკუთრებული ყურადღება დაეთმო სტრატეგიულ კომუნიკაციას სამიზნე ჯგუფებთან და ზოგადად, საქართველოს მოსახლეობასთან.

## 2. პოლიტიკური დიალოგი და რეფორმა, თანამშრომლობა საგარეო და უსაფრთხოების პოლიტიკის სფეროში

### 2.1 მართლმსაჯულების სისტემის რეფორმა

2017 წლის მარტში, იუსტიციის უმაღლესი საბჭოს ფარგლებში **ამოქმედდა დამოუკიდებელი ინსპექტორის ინსტიტუტი**, რომელიც უზრუნველყოფს დისციპლინური პროცედურების ეფექტურობას, სასამართლოს პრესტიჟისა და ავტორიტეტის სათანადო დაცვას და დისციპლინური სამართალწარმოების შესაბამისობას სასამართლოს დამოუკიდებლობისა და მოსამართლის საქმიანობაში ჩაურევლობის პრინციპებთან.

რეგულარულად მიმდინარეობს განრიდებისა და მედიაციის პროგრამაში მონიტორინგის შედეგად გამოვლენილი ხარვეზების თაობაზე უწყებებისადმი რეკომენდაციით მიმართვა და ადგილობრივ დონეზე ხდება ხარვეზების აღმოფხვრა.

განხორციელდა პროკურატურის, პრობაციის ეროვნული სააგენტოსა და დანაშაულის პრევენციის ცენტრის თანამშრომლების გადამზადება განრიდების/განრიდებისა და მედიაციის საკითხებზე.

**საერთო სასამართლოების შესახებ საქართველოს ორგანულ კანონში შეტანილ იქნა ცვლილებები.** 2017 წლის თებერვალში განხორციელებული ცვლილება შეეხო მოსამართლის თანამდებობის დაკავების წესსა და კანდიდატის შერჩევის კრიტერიუმებს, ხოლო 2017 წლის ივნისში განხორციელებული ცვლილება შეეხო 3 წელზე მეტი გამოცდილების მქონე მოსამართლეების გამოსაცდელი ვადის გარეშე უვადოდ გამწესების საკითხს (საკონსტიტუციო სასამართლოს 2017 წლის თებერვლის გადაწყვეტილების საფუძველზე).

სასამართლო მედიაციის პროექტის განვითარების მიზნით მემორანდუმი გაფორმდა იუსტიციის უმაღლეს საბჭოს, თბილისის საქალაქო სასამართლოსა და საქართველოს მედიატორთა ასოციაციას შორის.

2017 წლის მაისში, მიღებული იქნა იუსტიციის უმაღლესი საბჭოს გადაწყვეტილება „**საქართველოს საერთო სასამართლოებში საქმეთა ავტომატურად, ელექტრონული სისტემის მეშვეობით განაწილების წესის დამტკიცების შესახებ**“. აღნიშნული წესის საფუძველზე შექმნილია ელექტრონული განაწილების პროგრამა, რომელიც 2017 წლის 1 ივლისიდან სატესტო რეჟიმში ფუნქციონირებს რუსთავის საქალაქო სასამართლოში.

2017 წლის 29 მაისს, საქართველოს იუსტიციის უმაღლესმა საბჭომ **დაამტკიცა საერთო სასამართლოების სისტემის 2017-2021 წლების სტრატეგია და 2017-2018 წლების სამოქმედო გეგმა.**

„სამოქალაქო უსაფრთხოების შესახებ“ საქართველოს კანონში ცვლილების შეტანის თაობაზე 2106 წლის 13 ივლისის კანონისა და „საქართველოს შინაგან საქმეთა სამინისტროში სამსახურის გავლის წესის დამტკიცების შესახებ“ საქართველოს შინაგან საქმეთა მინისტრის 2013 წლის 31 დეკემბრის №995 ბრძანებაში ცვლილების შეტანის თაობაზე“ საქართველოს შინაგან საქმეთა მინისტრის 2017 წლის 30 ივნისის №333 ბრძანების საფუძველზე, განხორციელდა საქართველოს შინაგან საქმეთა სამინისტროს საჯარო სამართლის იურიდიული პირის - საგანგებო სიტუაციების მართვის სააგენტოში სამოქალაქო ოფისისა და საპოლიციო სამსახურების გამოიჯენა.

2017 წლის 12 აპრილს, დამტკიცდა საქართველოს პროკურატურის 2017-2021 წლების სამოქმედო გეგმა.

2017 წლის 25 მაისს, საქართველოს იუსტიციის მინისტრის ბრძანებით დამტკიცდა პროკურატურის მუშაკთა ეთიკის კოდექსი.

2017 წლის პირველ ნახევარში, შემუშავდა 7 რეკომენდაცია პროკურორების კომპეტენციაში შემავალ შემდეგ საკითხებზე:

- ❖ განაჩენის გადასინჯვის პროცედურები;
- ❖ საკასაციო საჩივრის შეტანა;
- ❖ საქართველოს სისხლის სამართლის კოდექსის 353-ე და 351<sup>1</sup>-ე მუხლებით ქმედების კვალიფიკაცია;
- ❖ ნარკოტიკულ დანაშაულში ბრალდებული პირისთვის ნარკოტიკული დანაშაულის წინააღმდეგ ბრძოლის შესახებ კანონით განსაზღვრული უფლებების ჩამორთმევის თაობაზე საპროცესო შეთანხმებაში პროკურორის პოზიციის განსაზღვრა;
- ❖ გირაოს შეფარდების მოთხოვნა;
- ❖ რელიგიური შეუწყნარებლობის მოტივით ჩადენილი დანაშაულის კვალიფიკაცია;
- ❖ არასათანადო მოპყრობის ფაქტების გამოძიება.

## 2.2 ადამიანის უფლებები და ძირითადი თავისუფლებები

2017 წლის 15 მაისს, დამტკიცდა წამებისა და არასათანადო მოპყრობის სხვა ფორმებთან ბრძოლის 2017-2018 წლების სამოქმედო გეგმა. მიმდინარეობს სამოქმედო გეგმით გათვალისწინებული აქტივობების შესრულება.

2017 წლის 5 აპრილს, საქართველოს პარლამენტმა მოახდინა „ქალთა მიმართ ძალადობისა და ოჯახში ძალადობის პრევენციისა და აღკვეთის შესახებ“ ევროპის საბჭოს კონვენციის (სტამბოლის კონვენცია) რატიფიცირება. სტამბოლის კონვენციასთან ეროვნული კანონმდებლობის ჰარმონიზაციისა და მასთან შესაბამისობაში მოყვანის მიზნით, 2017 წლის 4 მაისს, ცვლილებები შევიდა 25-მდე საკანონმდებლო აქტში. საკანონმდებლო ცვლილებები ძალაში შევიდა მიმდინარე წლის 1 ივნისიდან. ამასთან, 2017 წლის 12 ივნისს, შეიქმნა

გენდერული თანასწორობის, ქალთა მიმართ ძალადობისა და ოჯახში ძალადობის საკითხებზე მომუშავე უწყებათაშორისი კომისია, რომელიც ასევე ასრულებს სტამბოლის კონვენციის მაკოორდინირებელი ორგანოს ფუნქციებს.

პენიტენციურ სისტემაში სპეციალიზებული სამედიცინო მომსახურება ხელმისაწვდომია დაწესებულებაში განთავსებული ყველა ბრალდებულისთვის /მსჯავრდებულისთვის.

2017 წლის პირველი თებერვლიდან სახელმწიფო სერვისების განვითარების სააგენტოს მიერ შესაძლებლობა ჰუმანიტარული სტატუსის მქონე პირებზე გასცეს სამგზავრო პასპორტი სტატუსის დამადასტურებელი შესაბამისი სტიკერით.

საქართველოსთვის ევროპის საბჭოს 2016-2019 წლების სამოქმედო გეგმის ფარგლებში, წამატებით ხორციელდება პროექტები, რომლებიც ემსახურება საქართველოში ადამიანის უფლებების, დემოკრატიისა და სამართლის უზენაესობის განმტკიცებას.

ევროკავშირისა და ევროპის საბჭოს ერთობლივი ინიციატივის - „პარტნიორობა კარგი მმართველობისთვის“ (PGG) ფარგლებში, ასევე წარმატებით ხორციელდება 2015-2017 წლების ფაზით გათვალისწინებული პროექტები.

### **2.3 საჯარო სამსახურის რეფორმა და კორუფციასთან ბრძოლა**

**2017 წლის 1 ივლისიდან, ამოქმედდა „საჯარო სამსახურის შესახებ“ საქართველოს ახალი კანონი**, რომელმაც შექმნა კარიერულ პრინციპზე, დამსახურებაზე, კეთილსინდისიერებაზე, პოლიტიკურ ნეიტრალიტეტზე, მიუკერძოებლობასა და ანგარიშვალდებულებაზე დაფუძნებული სტაბილური, ერთიანი საჯარო სამსახურის ჩამოყალიბებისა და ფუნქციონირების სამართლებრივი საფუძვლები.

განახლდა და 2017 წლის 24 აპრილს, ანტიკორუფციული საბჭოს სხდომაზე **დამტკიცდა ანტიკორუფციული სტრატეგია და 2017-2018 წლების ანტიკორუფციული სამოქმედო გეგმა.**

2017 წლის 21 აპრილს, **მიღებულ იქნა „ელექტრონული დოკუმენტისა და ელექტრონული სანდო მომსახურების შესახებ“ კანონი.**

„საქართველოს სახელმწიფო უსაფრთხოების სამსახურსა და ლიტვის რესპუბლიკის სპეციალურ საგამომიებო სამსახურს შორის თანამშრომლობის შესახებ“ 2016 წელს გაფორმებული შეთანხმების ფარგლებში, მიმდინარეობდა აქტიური თანამშრომლობა საქართველოსა და ლიტვის რესპუბლიკას შორის კორუფციის პრევენციის მიმართულებით გამოცდილებისა და საუკეთესო პრაქტიკის გაზიარების კუთხით. 2017 წლის იანვარში, ქ. ვილნიუსში ჩატარდა მაღალი დონის ორმხრივი შეხვედრები, ასევე ინტენსიურად მიმდინარეობს ინფორმაციის გაცვლა და გამოცდილების გაზიარება.

2017 წლის იანვარ - ივნისში, სახელმწიფო უსაფრთხოების სამსახურის ანტიკორუფციული სააგენტოს 60-მდე თანამშრომელმა მონაწილეობა მიიღო, როგორც საქართველოში, ისე ქვეყნის ფარგლებს გარეთ, კვალიფიკაციის ასამაღლებელ სხვადასხვა ღონისძიებაში.

#### **2.4 თანამშრომლობა საგარეო და უსაფრთხოების პოლიტიკის სფეროში**

2017 წლის პირველ ნახევარში, ევროკავშირის მიერ სხვადასხვა ორგანიზაციებში და ევროკავშირის უმაღლესი წარმომადგენლის მიერ საგარეო და უსაფრთხოების პოლიტიკის საკითხებზე გაკეთებული 150 განცხადებიდან საქართველო მიუერთდა 136 განცხადებას. სანქციების ღონისძიებების მიმართულებით ევროკავშირის 9 განცხადებიდან საქართველო მიუერთდა 4 განცხადებას.

საქართველო-აზერბაიჯანი-თურქეთის რეგიონალური თანამშრომლობის ფარგლებში, 2017 წლის 17 თებერვალს, ქ. სტამბოლში გაიმართა ეკონომიკის მინისტრების შეხვედრა და სამხრეთი ბიზნეს-ფორუმი. 2017 წლის 23 მაისს, ქ. ბათუმში ჩატარდა თავდაცვის მინისტრების შეხვედრა.

2017 წლის 27 მარტს, ქ. კიევში სუამ-ის პრემიერ-მინისტრების შეხვედრის ფარგლებში მიღებულ იქნა სუამ-ის წევრი ქვეყნების მთავრობათა ხელმძღვანელების ერთობლივი განცხადება და ხელი მოეწერა ორ დოკუმენტს:

- ❖ „სუამ-ის მონაწილე სახელმწიფოთა შორის თავისუფალი სავაჭრო ზონის შექმნის შესახებ“ 2002 წლის 20 ივლისის შეთანხმების ხელშემკვრელ მხარეთა მოქმედებების მაკოორდინირებელი სამუშაო ორგანოს შექმნისა და საქმიანობის წესის დამტკიცების შესახებ“ ოქმი;
- ❖ „სუამ-ის წევრ სახელმწიფოთა საბაჟო ადმინისტრაციებს შორის სუამ-ის წევრ სახელმწიფოთა საზღვარზე გადაადგილებული საქონლისა და სატრანსპორტო საშუალებების საბაჟო კონტროლის ცალკეული შედეგების ურთიერთალიარების შესახებ“ ოქმი.

საქართველოს მთავრობის 2017 წლის 21 აპრილის №202 დადგენილებით დამტკიცდა თავდაცვის სტრატეგიული მიმოხილვის დოკუმენტი 2017-2020 წლებისთვის.

2017 წლის თებერვალში, განხორციელდა ოცეულის (35ს/მ) გაგზავნა ცენტრალური აფრიკის რესპუბლიკაში ევროკავშირის სამხედრო საწვრთნელ მისიაში (EUTM RCA). მეორე როტაცია განხორციელდა მიმდინარე წლის აგვისტოში, ხოლო მისიაში მონაწილეობის დასრულება დაგეგმილია 2018 წლის სექტემბერში. 2017 წლის ივნისში, განხორციელდა მალიში ევროკავშირის საწვრთნელ მისიაში (EUTM Mali) მე-4 გეგმიური როტაცია. მისიაში მონაწილეობის დასრულება დაგეგმილია 2018 წლის მაისში.



2017 წლის 17 ივლისს, საქართველოსა და ევროკავშირის შორის გაიმართა ორმხრივი კონსულტაციები თავდაცვისა და უსაფრთხოების სფეროში, რომლის ფარგლებშიც განახლდა უწყებათაშორისი სამუშაო გეგმა და განისაზღვრა აქტივობები 2018 წლისათვის.

2017 წლის პირველ ნახევარში გამართულ ჟენევის საერთაშორისო მოლაპარაკებების 39-ე და მე-40 რაუნდებზე, ქართველი მონაწილეები აქტიურად აყენებდნენ ოკუპირებული ტერიტორიებიდან ლტოლვილთა და იძულებით გადაადგილებულ პირთა უსაფრთხო და ღირსეული დაბრუნების საკითხს. საქართველო ხაზს უსვამდა აღნიშნული ჰუმანიტარული საკითხის, როგორც ჟენევის ფორმატის ერთ-ერთი ქვაკუთხედის, არსებითი განხილვისა და მასზე პროგრესის მიღწევის აუცილებლობას.

2017 წლის 24 მარტს, ქ. ჟენევაში გაერო-ს ადამიანის უფლებათა საბჭომ, 34-ე სესიის ფარგლებში მიიღო რეზოლუცია „თანამშრომლობა საქართველოსთან“. რეზოლუციის შესაბამისად, 21 ივნისს, გაერო-ს ადამიანის უფლებათა საბჭოს 35-ე სესიის ფარგლებში, ადამიანის უფლებათა გაერო-ს უმაღლესი კომისრის ოფისმა წარმოადგინა ზეპირი ანგარიში საქართველოში, მათ შორის მის ოკუპირებულ რეგიონებში ადამიანის უფლებათა კუთხით არსებული მდგომარეობის შესახებ.

2017 წლის 1 ივნისს, გაერო-ს გენერალურმა ასამბლეამ 71-ე სესიაზე კიდევ ერთხელ მიიღო რეზოლუცია „აფხაზეთიდან, საქართველო და ცხინვალის რეგიონიდან/სამხრეთ ოსეთი, საქართველო იძულებით გადაადგილებულ პირთა და ლტოლვილთა სტატუსის შესახებ“, რითიც კვლავ დაადასტურა დევნილთა ფუნდამენტური უფლებები, უპირველესად, საკუთარ საცხოვრებელ ადგილებში ნებაყოფლობითი, უსაფრთხო და ღირსეული დაბრუნების უფლება. აღსანიშნავია, რომ რეზოლუციის მხარდამჭერთა რაოდენობა კვლავ გაიზარდა 80-მდე, მოწინააღმდეგეთა რაოდენობა შემცირდა 14-მდე, ასევე შემცირდა თავშეკავებულთა რაოდენობა 61-მდე.

საქართველო აქტიურად თანამშრომლობდა ევროკავშირის სადამკვირვებლო მისიასთან საოკუპაციო ხაზზე კონფლიქტის ესკალაციის პრევენციისა და რუსეთის პროვოკაციულ ქმედებებთან გამკლავების მიზნით. პარტნიორ ქვეყნებთან, ისევე როგორც საერთაშორისო ორგანიზაციებთან, საქართველო მუდმივად აყენებს ევროკავშირის სადამკვირვებლო მისიის ოკუპირებულ რეგიონებში შესვლისა და მანდატის სრულად განხორციელების აუცილებლობას.

ჩატარდა საქართველოსა და ევროკავშირის შორის სხვადასხვა დონის არაერთი შეხვედრა თუ კონსულტაცია რუსეთ-საქართველოს კონფლიქტის მშვიდობიანი დარეგულირების გზებთან დაკავშირებით, ამ პროცესში ევროკავშირის როლის გააქტიურების საკითხზე, ასოცირების შეთანხმებიდან და სავიზო რეჟიმის ლიბერალიზაციიდან გამომდინარე სარგებელის ადმინისტრაციულ გამყოფ ხაზს მიღმა მცხოვრები მოსახლეობისთვის გაზიარების უზრუნველყოფის მიზნით გზების შესამუშავებლად, ასევე საქართველოს შერიგებისა და

ჩართულობის პოლიტიკის და ევროკავშირის არალიარებისა და ჩართულობის პოლიტიკის ქრილში ორ მხარეს შორის კოორდინაციის შემდგომი გაძლიერების მიზნით.

ევროკავშირის მხრიდან გაკეთდა არაერთი განცხადება საქართველოს ოკუპირებული ტერიტორიების მიმართ რუსეთის უკანონო ქმედებებსა და ადგილზე განვითარებულ მოვლენებთან დაკავშირებით. ევროკავშირი გამოეხმაურა აფხაზეთის რეგიონში ჩატარებულ ე.წ. არჩევნებს, ე.წ. გადასასვლელი პუნქტების დახურვას, სოხუმში რუსეთის პრეზიდენტის ვიზიტს და სხვა.

ოკუპირებულ რეგიონებში უსაფრთხოებისა და ადამიანის უფლებათა დაცვის საერთაშორისო მექანიზმების შექმნა იყო საქართველოს საგარეო პოლიტიკის ერთ-ერთი მნიშვნელოვანი პრიორიტეტი როგორც ორმხრივ, ისე მრავალმხრივ ურთიერთობებში. საერთაშორისო თანამეგობრობას რეგულარულად მიეწოდებოდა ინფორმაცია ოკუპირებულ ტერიტორიებზე უსაფრთხოებისა და ადამიანის უფლებათა კუთხით არსებული მძიმე მდგომარეობისა და ადგილზე საერთაშორისო ყოფნის აუცილებლობის შესახებ.

საანგარიშო პერიოდში, საერთაშორისო თანამეგობრობას გაერო-ს სხვადასხვა ფორმატში, მათ შორის გაერო-ს უშიშროების საბჭოს თემატურ დებატებსა და ადამიანის უფლებათა საბჭოს სხდომებზე, აგრეთვე ეუთო-ს მუდმივი საბჭოსა და ევროპის საბჭოს მინისტრთა მოადგილეების კომიტეტის სხდომებზე, რეგულარულად მიეწოდებოდა ინფორმაცია ოკუპირებულ ტერიტორიებზე არსებულ მდგომარეობასა და ადამიანის უფლებების დარღვევის ფაქტებზე. აღსანიშნავია, რომ 2017 წლის 21 თებერვალს, საგარეო საქმეთა მინისტრმა მონაწილეობა მიიღო გაერო-ს უშიშროების საბჭოს ღია დებატებში, თემაზე: საერთაშორისო მშვიდობისა და უსაფრთხოების შენარჩუნება - კონფლიქტები ევროპაში. 2017 წლის 28 მარტს, გაერო-სთან უკრაინის დელეგაციის ინიციატივით, უშიშროების საბჭოს დახურულ სხდომაზე განხილულ იქნა საქართველოს ოკუპირებულ ტერიტორიებზე არსებული ვითარება.

გრძელდება ინტენსიური მუშაობა რუსეთის მხრიდან 2008 წლის 12 აგვისტოს ცეცხლის შეწყვეტის შეთანხმების შესრულების უზრუნველსაყოფად და ამ მიზნით, საერთაშორისო თანამეგობრობის მხარდაჭერის მობილიზება. საერთაშორისო საზოგადოებას მუდმივად მიეწოდება ინფორმაცია რუსეთის მხრიდან ცეცხლის შეწყვეტის შეთანხმების დარღვევის ფაქტებზე და მიმდინარეობს მუშაობა საერთაშორისო საზოგადოების მხრიდან სათანადო რეაგირების უზრუნველყოფის მიზნით. აღნიშნული საკითხები არაერთხელ იქნა ასახული როგორც პარტნიორი ქვეყნების განცხადებებში, ანგარიშებსა და მათი საკანონმდებლო ორგანოების მიერ მიღებულ რეზოლუციებში, ისე საერთაშორისო ორგანიზაციების ფარგლებში (გაერო, ეუთო, ევროსაბჭო, ნატო) მიღებულ რეზოლუციებში, გადაწყვეტილებებსა თუ ანგარიშებში.

2017 წლის 3 მაისს, ევროპის საბჭოს მინისტრთა მოადგილეების კომიტეტის 1285-ე სხდომაზე, დღის წესრიგის საკითხის „ევროპის საბჭო და კონფლიქტი საქართველოში“ ფარგლებში, მიღებულ იქნა გადაწყვეტილება. დოკუმენტში კიდევ ერთხელ გამოიხატა ევროპის საბჭოს წევრი ქვეყნების მტკიცე მხარდაჭერა საქართველოს სუვერენიტეტისა და ტერიტორიული მთლიანობის მიმართ და ყურადღება გამახვილდა რუსეთის, როგორც კონფლიქტის მხარის საერთაშორისო სამართლებრივ პასუხისგებლობაზე, რომელიც ახორციელებს ფაქტობრივ კონტროლს საქართველოს ოკუპირებულ ტერიტორიებზე.

2017 წლის პირველ ნახევარში გაიმართა ინციდენტების პრევენციისა და მათზე რეაგირების მექანიზმის (IPRM) 12 შეხვედრა (6 შეხვედრა ოკუპირებული ცხინვალის რეგიონის მიმართულებით და 6 - ოკუპირებული აფხაზეთის მიმართულებით), რომლის დროსაც საქართველოს ხელისუფლებამ რიგი მნიშვნელოვანი საკითხები დააყენა, კერძოდ, საოკუპაციო ხაზის მიმდებარედ და ოკუპირებულ რეგიონებში ინციდენტების, ადამიანის უფლებების დარღვევის და ე.წ. ბორდერიზაციის საკითხები.

IPRM-ის ფარგლებში შექმნილი „ცხელი ხაზი“ 2017 წლის პირველ ნახევარში 762-ჯერ ამოქმედდა. აღნიშნულ მექანიზმს საქართველოს ხელისუფლება საოკუპაციო ხაზსა და მის მიმდებარე ტერიტორიაზე ინციდენტების/დამაბულობის პრევენციის და უმოკლეს ვადაში გარკვევა-გადაწყვეტის კუთხით იყენებს.

2017 წლის 30 ივნისს, შერიგებისა და სამოქალაქო თანასწორობის საკითხებში სახელმწიფო მინისტრის აპარტმა შეხვედრა გამართა აფხაზეთის რეგიონში Abkhazia Strategic Partnership (ASP) ფარგლებში მოქმედ საერთაშორისო ორგანიზაციებთან, სადაც განიხილებოდა აღნიშნული ორგანიზაციების საქმიანობა, მიმდინარე პროექტები, არსებული გამოწვევები და სამომავლო პერსპექტივები. საანგარიშო პერიოდში, საერთაშორისო ორგანიზაციების მიერ ოკუპირებული რეგიონების მიმართულებით დაფინანსდა და დაიწყო დამატებით 37 პროექტი.

2017 წლის პირველ ნახევარში, აფხაზეთის რეგიონს მიეწოდა იმუნიზაციის ორი კვარტლის ვაქცინები, B ჰეპატიტის საწინააღმდეგო ვაქცინები და დიაბეტის საწინააღმდეგო წამლები.

საკოორდინაციო მექანიზმის საშუალებით, აფხაზეთის რეგიონს პერიოდულად გადაეცემა სასწრაფო დახმარების მანქანები, სამედიცინო ინვენტარი, ტექნიკა, აღჭურვილობა და სხვადასხვა სამედიცინო დანიშნულების ნივთი. გალის, ტყვარჩელის და ოჩამჩირის რაიონებში თხილის მავნებლებთან ბრძოლის მიზნით რეგიონს გადაეცა შესაწამლი ტექნიკა და საჭირო პესტიციდები.

საქართველოს ოკუპირებული ტერიტორიების მაცხოვრებლები აგრძელებენ C ჰეპატიტის ელიმინაციის პროგრამაში ჩართვას და სათანადო სამედიცინო მომსახურების მიღებას. 2017 წლის მარტში, ზუგდიდში გაიხსნა C ჰეპატიტის მართვის ცენტრი, რომელიც ადგილობრივ მოსახლეობასთან ერთად, ოკუპირებულ ტერიტორიაზე მცხოვრებ პირებს ემსახურება. C

ჰეპატიტის ელიმინაციის პროგრამაში ჩართვა შესაძლებელი გახდა სტატუს ნეიტრალური დოკუმენტების საფუძველზე.

**საქართველოს მთავრობა განაგრძობს „1+4“ პროგრამის განხორციელებას, რომელიც** საშუალებას აძლევს ეთნიკური უმცირესობების წარმომადგენლებს, მათ შორის აფხაზებსა და ოსებს, გამარტივებული პროცედურებით ჩაირიცხონ საქართველოს უმაღლეს საგანმანათლებლო დაწესებულებებში მშობლიურ ენაზე მხოლოდ ერთი გამოცდის ჩაბარების გზით, რასაც თან ერთვის ქართულ ენაში მოსამზადებელი ერთწლიანი კურსი, ხოლო შემდეგ ოთხწლიანი საბაკალავრო პროგრამა სტუდენტის მიერ შერჩეულ ფაკულტეტზე. "1+4" პროგრამის ფარგლებში სწავლა ფინანსდება სახელმწიფოს მიერ.

საქართველოს ოკუპირებულ ტერიტორიებზე მიღებული განათლების აღიარების პროცედურების გამარტივების მიზნით, **2017 წლის 11 იანვარს ცვლილებები განხორციელდა „ოკუპირებულ ტერიტორიებზე მიღებული უმაღლესი განათლების აღიარების წესის დამტკიცების შესახებ“ საქართველოს განათლებისა და მეცნიერების მინისტრის 2009 წლის 1 დეკემბრის №1067 ბრძანებაში.** ცვლილებების თანახმად, ოკუპირებულ ტერიტორიებზე მცხოვრებ პირებს უმაღლესი განათლების აღიარების მიღება შეუძლიათ სათანადო განაცხადით, ელექტრონულად, მათ შორის აფხაზურ ენაზე, ან საერთაშორისო ორგანიზაციის მეშვეობით, მოწმეების წარმოდგენის, საქართველოს მოქალაქეობის აღებისა და საქართველოს კონტროლირებად ტერიტორიაზე მგზავრობის გარეშე.

მომზადდა ინიციატივები გამყოფი ხაზის გასწვრივ ვაჭრობის წახალისების, ოკუპირებულ ტერიტორიებზე მცხოვრები მოსახლეობის განათლების შესაძლებლობების განვითარების და მათ მიერ საქართველოს მოქალაქის პასპორტის აღების პროცედურების გამარტივების შესახებ.

2017 წლის პირველ ნახევარში, ევროპის საბჭომ განახორციელა ორმხრივი ნდობის აღდგენის 7 პროექტი.

### 3. თავისუფლება, უსაფრთხოება და მართლმსაჯულება

საანგარიშო პერიოდში, პერსონალურ მონაცემთა დაცვის ინსპექტორის აპარატის მიერ გაწეული კონსულტაციის რაოდენობამ შეადგინა 1,054.

2017 წლის პირველ ნახევარში, პერსონალურ მონაცემთა დაცვის ინსპექტორის აპარატმა განიხილა მოქალაქეთა 112 განცხადება და შეტყობინება, რომელთა შესწავლის შედეგად გამოვლინდა სამართალდარღვევის 28 ფაქტი.

საანგარიშო პერიოდში, პერსონალურ მონაცემთა დაცვის ინსპექტორის აპარატმა ჩაატარა 21 ინსპექტირება. ინსპექტირების ფარგლებში შემოწმდა 7 საჯარო დაწესებულება და 14 კერძო ორგანიზაცია. შედეგად, გამოვლინდა სამართალდარღვევის 47 ფაქტი.

საქართველოს შინაგან საქმეთა სამინისტროსა და ევროკავშირის საზღვრისა და სანაპირო დაცვის სააგენტოს (FRONTEX) შორის მიმდინარეობს მოლაპარაკებები ახალი შეთანხმების გაფორმების თაობაზე.

შეფასებულ იქნა საქართველოს 2016-2020 წლების მიგრაციის სტრატეგიის საბაზისო და მისი 2016-2017 წლების სამოქმედო გეგმის 2016 წლის აქტივობები.

დასრულდა მიგრაციის სახელმძღვანელოს რედაქტირების პროცესი და აღნიშნული სახელმძღვანელო უახლოეს მომავალში გამოიცემა.

საქართველოს 2017 წლის მიგრაციის პროფილისთვის შეგროვდა ყველა საჭირო სტატისტიკური მონაცემი და გეგმიურად მიმდინარეობს მათი დამუშავება/ანალიზი.

მიგრაციის ერთიანი ანალიტიკური სისტემა უკვე ამუშავებს პარტნიორი უწყებების რეალურ მონაცემებს. სისტემა იძლევა ანალიტიკური ინფორმაციის ამოღების საშუალებას, მიღებული მონაცემების ხარისხის გათვალისწინებით.

2017 წლის პირველი იანვრიდან 29 ივნისამდე პერიოდში, გაუქმდა 106 894 არაბიომეტრიული პასპორტი. დღეის მდგომარეობით, 516 686 აქტიური არაბიომეტრიული პასპორტი აქვს 511 680 პირს.

2017 წლის 23 თებერვალს, ხელი მოეწერა საქართველოსა და ლატვიის რესპუბლიკას შორის სასაზღვრო სფეროში თანამშრომლობის 2017 წლის გეგმას.

2017 წლის 18-22 აპრილს, თურქეთის რესპუბლიკაში საქართველოს სანაპირო დაცვის დეპარტამენტსა და თურქეთის რესპუბლიკის სანაპირო დაცვის სარდლობას შორის შედგა ორმხრივი სამუშაო შეხვედრა და ხელი მოეწერა ორმხრივი თანამშრომლობის ოქმს.

2017 წლის 1 თებერვალს ძალაში შევიდა საქართველოს კანონი „საერთაშორისო დაცვის შესახებ“.

2017 წლის პირველი ნახევრის მდგომარეობით, რეადმისიის მართვის ელექტრონულ პროგრამაში ჩაერთო ლატვიის რესპუბლიკა. პროგრამაში ჩართვასთან დაკავშირებით, ამჟამად მიმდინარეობს მუშაობა ესტონეთის რესპუბლიკასთან, კვიპროსის რესპუბლიკასთან, პორტუგალიასთან, დანიის სამეფოსთან, შვედეთის სამეფოსთან და დიდი ბრიტანეთისა და ჩრდილოეთ ირლანდიის გაერთიანებულ სამეფოსთან.

მესამე ქვეყნებთან რეადმისიის ხელშეკრულების გაფორმების მიზნით, საქართველოს მთავრობას განსახილველად წარედგინა რეადმისიის ხელშეკრულების პროექტები ავღანეთთან, კამერუნთან, კოტ-დ'ივუართან, კონგოს დემოკრატიულ რესპუბლიკასთან, ერაყთან, გამბიასთან, განასთან, ლიბანთან, სომალისთან და ტუნისთან. საქართველოს მთავრობის მიერ შესაბამისი პროცედურების დასრულების შემდეგ, მოხდება მესამე ქვეყნებთან აღნიშნული რეადმისიის შეთანხმებების ინიცირება.

მესამე წელია სახელმწიფო ბიუჯეტის დაფინანსებით ხორციელდება პროგრამა „საქართველოში დაბრუნებულ მიგრანტთა სარეინტეგრაციო დახმარება“ .

საქართველოს შინაგან საქმეთა მინისტრის 2017 წლის 25 მაისის №275 ბრძანების საფუძველზე, დამტკიცდა საზოგადოებაზე ორიენტირებული პოლიციის კონცეფცია.

მომზადებულია საკანონმდებლო ცვლილებების პაკეტი ორგანიზებული დანაშაულის წინააღმდეგ ბრძოლის შესახებ და საკანონმდებლო ცვლილებების პაკეტი იარაღის უკანონო ბრუნვის აღკვეთის შესახებ.

ტერორიზმის წინააღმდეგ ბრძოლის საკითხებზე ორმხრივი და მრავალმხრივი თანამშრომლობის გაღრმავების მიზნით, მიმდინარეობს აქტიური მუშაობა პარტნიორი ქვეყნების შესაბამის უწყებებსა და საერთაშორისო ორგანიზაციებთან.

2017 წლის 27 ივნისს, ხელი მოეწერა „ამერიკის შეერთებული შტატების მთავრობასა და საქართველოს მთავრობას შორის ტერორისტების შემოწმების ინფორმაციის გაცვლის შესახებ შეთანხმებას“.

2017 წლის 1 თებერვლიდან ძალაში შევიდა შეთანხმება „საქართველოსა და ევროპის კავშირის შორის საიდუმლო ინფორმაციის გაცვლისა და დაცვის უსაფრთხოების პროცედურების შესახებ“.

2017 წლის 9 მაისს, ხელი მოეწერა „საქართველოს მთავრობასა და ამერიკის შეერთებული შტატების მთავრობას შორის საიდუმლო ინფორმაციის დაცვის უსაფრთხოების ზომების შესახებ შეთანხმებას“ (GSOIA).

2017 წლის 7 თებერვალს, ხელი მოეწერა შეთანხმებას „საქართველოს მთავრობასა და შვედეთის მთავრობას შორის სამართალდაცვით სფეროში თანამშრომლობის შესახებ“.

2017 წლის 4 აპრილს, ქ. თბილისში ხელი მოეწერა „საქართველოსა და ევროპის პოლიციის სამსახურს შორის ოპერატიული და სტრატეგიული თანამშრომლობის შესახებ“ შეთანხმებას, რომელიც საქართველოს პარლამენტის მიერ რატიფიცირებულ იქნა 2017 წლის 15 ივნისს და ძალაში შევიდა 31 ივლისს.

2017 წლის 22 ივნისს, ხელი მოეწერა შეთანხმებას „საქართველოს მთავრობასა და საბერძნეთის რესპუბლიკის მთავრობას შორის დანაშაულის წინააღმდეგ ბრძოლაში თანამშრომლობის შესახებ“.

საქართველოს ფულის გათეთრების და ტერორიზმის დაფინანსების საწინააღმდეგო კანონმდებლობის ევროკავშირის მეოთხე დირექტივასთან, აგრეთვე FATF-ისა და MONEYVAL-ის რეკომენდაციებთან შემდგომი დაახლოების მიზნით, საქართველოს მთავრობას განსახილველად წარედგინა კანონპროექტი - საქართველოს კანონში "უკანონო შემოსავლის ლეგალიზაციის აღკვეთის ხელშეწყობის შესახებ" პოლიტიკურად აქტიურ პირებთან დაკავშირებული ცვლილებების თაობაზე.

საქართველოს კანონმდებლობის 2005 წლის 26 ოქტომბრის ევროპარლამენტისა და საბჭოს 2005/60/EC ფულის გათეთრებისა და ტერორიზმის დაფინანსების მიზნებისთვის ფინანსური სისტემის გამოყენების აღკვეთის თაობაზე დირექტივასთან დაახლოების მიზნით, მომზადებულია „ლატარიების, აზარტული და მომგებიანი თამაშობების მოწყობის შესახებ“ საქართველოს კანონში ცვლილებების პაკეტი.

2017 წლის 19-21 აპრილს, აშშ-ის მხარდაჭერით, ქ. თბილისში, გაიმართა ერთობლივი უწყებათშორისი წვრთნა (Interagency CBRN Response Subject Matter Expert Exchange) ქიმიური, ბიოლოგიური, რადიოლოგიური და ბირთვული (ქბრბ) რეაგირების სფეროში. წვრთნებში მონაწილეობა მიიღო ქბრბ საკითხებზე მომუშავე შესაბამისი უწყებების სამოცმა წარმომადგენელმა.

2017 წლის 5-7 ივნისს, ქ. თბილისში, ევროკავშირის მხარდაჭერითა და დაფინანსებით მიმდინარე პროექტის „ქბრბ პირველადი რეაგირების შესაძლებლობებისა და თანამშრომლობის გაძლიერება სამხრეთ-აღმოსავლეთ ევროპაში, სამხრეთ კავკასიაში, მოლდოვასა და უკრაინაში“ ფარგლებში, ჩატარდა თეორიული სამაგიდო სწავლება და პრაქტიკული სავლე სავარჯიშო. სწავლებაში მონაწილეობა მიიღო შესაბამისი უწყებების ოცდაათამდე წარმომადგენელმა.

საანგარიშო პერიოდში, საქართველოს სოფლის მეურნეობის სამინისტროს სსიპ სურსათის ეროვნული სააგენტოს მიერ, სამ ეტაპად ჩატარდა ტრენინგი სავლე ბიოუსაფრთხოების

საკითხებთან დაკავშირებით. ქვეყნის მასშტაბით შეირჩა და სრულად გადამზადდა ბიოუსაფრთხოების 154 სპეციალისტი.

საანგარიშო პერიოდში დაიწყო ევროკავშირის პროექტის „ქბრბ ინციდენტების გამოძიებისას დანაშაულის ადგილზე კრიმინალისტიკური შესაძლებლობების გაუმჯობესება“ - განხორციელება, რომლის მიზანია საექსპერტო-კრიმინალისტიკური ბაზის მატერიალურ-ტექნიკური გაუმჯობესება, პერსონალის კვალიფიკაციის ამაღლება, ქბრბ დანაშაულის გამოძიებისათან მიმართებაში არსებული კანონმდებლობისა და სტანდარტული ოპერაციული პროცედურების შემუშავება და დახვეწა და სამართალდამცავ უწყებებს შორის თანამშრომლობის გაძლიერება, როგორც ეროვნულ, ასევე რეგიონულ დონეზე. 2017 წლის 30 მაისს-1 ივნისს, ქ. ბელგრადში, ჩატარდა პროექტის გახსნითი შეხვედრა, რომელშიც მონაწილეობა მიიღეს საქართველოს შესაბამისი უწყებების წარმომადგენლებმა.

საქართველოს გარემოსა და ბუნებრივი რესურსების დაცვის მინისტრის 2017 წლის 26 ივლისის N26 ბრძანებით დამტკიცდა „**ბირთვული და რადიაციული ობიექტების, რადიოაქტიური წყაროების, რადიოაქტიური ნარჩენების და მაიონებელი გამოსხივების სხვა წყაროების ფიზიკური უსაფრთხოების (დაცულობის) შესახებ**“ ნორმატიული აქტი.

საქართველოსა და ატომური ენერჯის საერთაშორისო სააგენტოს (IAEA) შორის გაფორმებული ურთიერთთანამშრომლობის მემორანდუმის ფარგლებში, რომელიც ითვალისწინებს 2018-2021 წლებში რადიაციული წყაროების მართვის შესახებ მნიშვნელოვანი პროექტის განხორციელებას, საქართველოს გარემოსა და ბუნებრივი რესურსების დაცვის სამინისტროს ორგანიზებით, 2017 წლის 6 აპრილს, ქ. თბილისში, გაიმართა შეხვედრა საქართველოსა და ატომური ენერჯის საერთაშორისო სააგენტოს წარმომადგენლებს შორის.



#### 4. ვაჭრობა და ვაჭრობასთან დაკავშირებული საკითხები

2016 წლის მაისიდან, საქართველოს ეკონომიკისა და მდგრადი განვითარების სამინისტროში მოქმედებს მინისტრის სათათბირო ორგანო DCFTA-ის საკონსულტაციო ჯგუფი, რომლის შემადგენლობაში შედიან ბიზნეს ასოციაციების, დამსაქმებელთა ასოციაციების, პროფესიული კავშირებისა და არასამთავრობო ორგანიზაციების წარმომადგენლები. მრჩეველთა ჯგუფი განიხილავს DCFTA-ის ფარგლებში დაგეგმილ და განხორციელებულ რეფორმებს და შეიმუშავებს რეკომენდაციებს DCFTA-ის იმპლემენტაციის საკითხებთან დაკავშირებით.

მიმდინარე წელს, გერმანიის საერთაშორისო თანამშრომლობის საზოგადოების (GIZ) მხარდაჭერით, შეიქმნა DCFTA-ის შესახებ ვებ-გვერდი, სადაც თავმოყრილია DCFTA-თან დაკავშირებული ყველა სახის ინფორმაცია, როგორც ვალდებულებების, ასევე ევროკავშირის ბაზარზე შესვლასთან დაკავშირებით არსებული მოთხოვნებისა და საერთაშორისო მხარდაჭერის შესახებ ინფორმაცია. გარდა ამისა, ვებ-გვერდზე განთავსდება DCFTA-ისთან დაკავშირებული ყველა კანონპროექტი და რეგულაციის პროექტი, რათა დაინტერესებულმა მხარეებმა შეძლონ კომენტარების გაკეთება მათ დამტკიცებამდე.

შეთანხმებასთან დაკავშირებულ საკითხებზე ცნობიერების ამაღლების მიზნით, თბილისსა და რეგიონებში ხორციელდება საინფორმაციო კამპანია. მიმდინარე წლის მონაცემებით, საქართველოს ეკონომიკისა და მდგრადი განვითარების სამინისტროს და ევროკავშირის პროექტის "ასოციაციების შესახებ შეთანხმების განხორციელების ხელშეწყობა" ორგანიზებით, კერძო და საჯარო სექტორს შორის დიალოგის ფარგლებში, ადგილობრივ მეწარმეებთან და ფერმერებთან გაიმართა 5 შეხვედრა (გორში, მცხეთაში, ზუგდიდში, ოზურგეთსა და შუახევში). შეხვედრებში მონაწილეობა მიიღო 400-ზე მეტმა მეწარმემ/ფერმერმა.

2017 წლის პირველი ნახევრის მდგომარეობით, სსიპ-მა „აწარმოე საქართველოში“, სახელმწიფო პროგრამის „აწარმოე საქართველოში“ ფარგლებში, განახორციელა დამატებით 47 საწარმოს თანადაფინანსება, რამაც დამატებით 1500 ახალი სამუშაო ადგილის შექმნა განაპირობა. საანგარიშო პერიოდში გაცემული 47 ახალი პროექტის დაფინანსებისათვის სესხების ჯამურმა მოცულობამ - ლ 54,7 მილიონი, ხოლო ჯამურმა ინვესტიციამ - ლ 108 მილიონი შეადგინა. (თანადაფინანსება განხორციელდა შემდეგ დარგებში: სამშენებლო მასალების წარმოება; ტექსტილის წარმოება; საკვები პროდუქტების წარმოება; პოლიეთილენის წარმოება; სოფლის მეურნეობის პროდუქციის გადამამუშავება; ქალაქის და მუყაოს წარმოება; ფარმაცევტული პროდუქციის წარმოება; ელექტრონული მოწყობილობების წარმოება; ლითონის წარმოება).

გერმანიის საერთაშორისო თანამშრომლობის საზოგადოება (GIZ) პროგრამის EU4business ფარგლებში, უზრუნველყოფს საქართველოში ევროპის მეწარმეთა ქსელის (Enterprise Europe Network – EEN) სერვისების განვითარებისა და შესაბამისი უნარების გადრეზუმების მხარდაჭერას. მიმდინარე წლის პირველი ნახევრის მდგომარეობით, სსიპ-ის „აწარმოე საქართველოში“ მხარდაჭერით, უკვე გაფორმდა ორი საპარტნიორო შეთანხმება ქართულ და

**ევროპულ კომპანიებს შორის და დამატებით, სამი ქართული კომპანიის ბიზნეს წინადადება განთავსდა ევროპის მეწარმეთა ქსელში.**

სსიპ „აწარმოე საქართველოში“ აქტიურად აგრძელებს ქართველი ექსპორტიორების სავაჭრო გამოფენებში მონაწილეობის ხელშეწყობას. მიმდინარე წლის პირველი ნახევრის მდგომარებით, **სააგენტომ უზრუნველყო 30-მდე ქართული კომპანიის საერთაშორისო გამოფენებში მონაწილეობა.**

მცირე და საშუალო ბიზნესის მხარდაჭერის მიზნით, საქართველოს მთავრობა ევროკავშირის ყოვლისმომცველი ინსტიტუციური გაძლიერების პროგრამის (CIB) მხარდაჭერით ახორციელებს რეფორმებს ეროვნული ხარისხის ინფრასტრუქტურის სფეროში. **საქართველო აქტიურად იკავებს რეგიონალური ჰაბის როლს ხარისხის ინფრასტრუქტურული სერვისების მიწოდების სფეროში** და მეზობელი ქვეყნებიდან სულ უფრო მეტი ლაბორატორია და მეწარმე იყენებს საქართველოში არსებულ შესაძლებლობებს.

CIB პროგრამის II ეტაპის ფარგლებში, **დასრულდა მეტროლოგიური ეტალონური ლაბორატორიების აღჭურვა სანიმუშო გაზომვის საშუალებებით.** არსებული მდგომარეობით, ახალი აღჭურვილობა განთავსდა შემდეგ ლაბორატორიებში - რადიაციული მეტროლოგია, მცირე მოცულობები, ძალა, წნევა, აკუსტიკური გაზომვები, ტემპერატურა, ელექტრობა, ტენიანობა, რადიო-ფიზიკური გაზომვები, დრო და სიხშირე, გეომეტრიული გაზომვები, ოპტიკა, მასა, დიდი მასები - საწონები და სასწორები.

2017 წლის პირველ ნახევარში, **საქართველოს სტანდარტად სულ მიღებული იქნა 1095 ევროპული და საერთაშორისო სტანდარტი.** მათ შორის: 26 საერთაშორისო (ISO, IEC); 1068 ევროპული (EN) და 1 სსტ (საქართველოს სტანდარტი). ამ ეტაპისათვის, საქართველოს სტანდარტად მიღებულია 11 000-ზე მეტი საერთაშორისო და ევროპული სტანდარტი.

მიმდინარე წელს მნიშვნელოვანი ნაბიჯი იქნა გადადგმული საქართველოს აკრედიტაციის ცენტრის საერთაშორისო აღიარების კუთხით. 2017 წლის 23 მაისს, **ევროპული აკრედიტაციის EA-ს გენერალურ ასამბლეაზე ხელი მოეწერა ორმხრივი აღიარების შეთანხმებას საქართველოს აკრედიტაციის ცენტრსა და EA-ს შორის.** აღიარება გულისხმობს საქართველოში აკრედიტებული პირების მიერ გაცემული სერტიფიკატების და ლაბორატორიული გამოცდის ოქმების საერთაშორისო აღიარებას. მაგალითისათვის უკვე შესაძლებელია, რომ საქართველოში მეწარმემ მიიღოს ევროკავშირში აღიარებული სერტიფიკატი ისეთ პროდუქტებზე როგორებიცაა: ხილი, ბოსტნეული, ხილის და ბოსტნეულისგან დამზადებული კონსერვები და სხვა სახის საკვები პროდუქტი, მინერალური და სასმელი წყალი, უალკოჰოლო სასმელები, ალკოჰოლიანი სასმელები, ფერადი და ძვირფასი ლითონები, ნავთობი და ნავთობპროდუქტები, ქიმიური მრეწველობის პროდუქტები, ავეჯი, გამზომი საშუალებების დაკალიბრება და სხვა.

საქართველოში სამრეწველო და სამომხმარებლო პროდუქტების ბაზარზე ზედამხედველობის ევროპული საუკეთესო პრაქტიკის შესაბამისი სისტემის ჩამოყალიბებისათვის მომზადდა ცვლილებები პროდუქტის უსაფრთხოებისა და თავისუფალი მიმოქცევის კოდექსში.

ევროკავშირის სანიტარიული და ფიტოსანიტარიული, ცხოველთა კეთილდღეობისა და სხვა საკანონმდებლო ღონისძიებების შესაბამისად შემუშავდა საკანონმდებლო დაახლოების სია. სია მოიცავს 272 დირექტივას, რომელთაგან დაახლოების ვადები გაწერილია 13 წელზე. აღნიშნული სიით, 2017 წელს განსაზღვრულია ევროკავშირის 17 სამართლებრივ აქტთან დაახლოება. 2017 წლის პირველი 8 თვის მდგომარეობით, დაახლოება განხორციელდა ევროკავშირის 6 საკანონმდებლო აქტთან, ხოლო მომზადებულია 9 დადგენილების პროექტი.

აღსანიშნავია, რომ საქართველოს მთავრობის მიერ გატარებული რეფორმების შედეგად, 2017 წლის მდგომარეობით, საქართველო დამატებულია იმ მესამე ქვეყნების ჩამონათვალში, საიდანაც შესაძლებელია თავლის, მატყლისა და ზღვის თევზისა და ზღვის თევზის პროდუქტების იმპორტი ევროკავშირში.

მიმდინარე წელს, დაიწყო სასაზღვრო ინსპექციის პუნქტის „წითელი ხიდის“ სანიტარიული, ფიტოსანიტარიული და ვეტერინარული კონტროლისათვის შენობის მშენებლობა. ასევე, CIB პროექტის ფარგლებში განხორციელდა SPS კონტროლისთვის საჭირო აღჭურვილობის შეძენა.

მომზადდა საზღვარზე ინტელექტუალური საკუთრების დაცვის კუთხით, საბაჟო აღსრულების პროცედურებთან დაკავშირებული კანონის პროექტი, რომელიც უახლოეს პერიოდში წარედგინება საქართველოს პარლამენტს.

განხორციელდა ცვლილებები სახელმწიფო შესყიდვების შესახებ საქართველოს კანონში, რომლითაც მოხდა DCFTA-ით გათვალისწინებული ვალდებულებების (ასოცირების შეთანხმების 144-ე მუხლი) შესრულება. აღნიშნული ცვლილებების თანახმად, კანონმდებლობაში აისახა არადისკრიმინაციულობის, თანასწორი მოპყრობის, გამჭვირვალობის და პროპორციულობის პრინციპები.

სახელმწიფო შესყიდვებთან დაკავშირებული დავების განხილვის ორგანოს ახალ მოწყობის და მეტი გამჭვირვალობის უზრუნველყოფის მიზნით, მომზადდა და საქართველოს მთავრობას განსახილველად წარედგინა კანონპროექტი.

კონკურენციის სააგენტოში დაიწყო ევროკავშირის ტექნიკური დახმარების 2-წლიანი პროექტი - „საქართველოს კონკურენციის სააგენტოს მხარდაჭერა“, რომელიც მიზნად ისახავს კონკურენციის სააგენტოს სამართლებრივი, ეკონომიკური და ტექნიკური შესაძლებლობების ეფექტიანობის გაზრდას ევროკავშირის საუკეთესო პრაქტიკისა და DCFTA-ის დებულებების შესაბამისად.

მომზადდა და საქართველოს პარლამენტს წარედგინა ინტელექტუალური საკუთრების უფლებების დაცვის მარეგულირებელ საქართველოს კანონმდებლობაში ცვლილების პაკეტი, რომელიც მიზნად ისახავს საქართველოსა და ევროკავშირის შორის გაფორმებული ასოცირების შეთანხმებით ნაკისრი ვალდებულებების შესრულებას. ცვლილებების შედეგად ინტელექტუალური საკუთრების დაცვის სფეროში საქართველოს კანონმდებლობა შესაბამისობაში მოვა ევროკავშირის სტანდარტებთან, რაც თავისთავად გულისხმობს ინტელექტუალური საკუთრების უფლებების დაცვის უფრო მაღალ სტანდარტს და გაძლიერებულ აღსრულების მექანიზმებს.

**მომზადდა საქართველოს კანონის პროექტი „ელექტრონული კომერციის შესახებ“.** კერძო და საჯარო სექტორთან მოეწყო კანონის პროექტის პრეზენტაცია და დეტალური განხილვა. მიმდინარე წლის ბოლოს იგეგმება კანონპროექტის წარდგენა საქართველოს პარლამენტში.

EBRD-ის საგრანტო დახმარების ფარგლებში, დასრულდა „ფოსტის შესახებ“ საქართველოს კანონის პროექტის მოდიფიკაცია/დახვეწა. კანონის პროექტი მოიცავს უნივერსალურ საფოსტო მომსახურებებს და საფოსტო სფეროს პოლიტიკის ძირითად მიმართულებებს. 2017 წლის ივლისში გაიმართა სამთავრობო უწყებებსა და შესაბამის სფეროში მოქმედ კერძო სექტორთან კანონპროექტის საჯარო განხილვა.

**მომზადდა ტყის ახალი კოდექსი.** დაგეგმილია საჯარო განხილვების გამართვა, რის შემდგომაც მოხდება კოდექსის ინიცირება საქართველოს პარლამენტში.

**შემუშავდა ტყისა და მიწათსარგებლობის საინფორმაციო სისტემის ვებ-პორტალი,** რაც ხელს შეუწყობს ტყისა და მიწათსარგებლობის ეფექტურ დაგეგმვას, მართვას და მონიტორინგს.

სატყეო სექტორის საკანონმდებლო ბაზის დახვეწისა და სატყეო ინსტიტუტების შესაძლებლობების გაძლიერების მიზნით, დაიწყო ევროკავშირის TWINNING-ის პროექტის - „საქართველოში ტყის მდგრადი მართვის გაძლიერება“ განხორციელება.

**პარიზის შეთანხმება კლიმატის ცვლილების შესახებ საქართველოსთვის ძალაში შევიდა.**

გერმანიის საერთაშორისო თანამშრომლობის ორგანიზაციის (GIZ) მხარდაჭერით მიმდინარე პროექტის „აღმოსავლეთ პარტნიორობის ქვეყნების შესაძლებლობის გაძლიერება ევროკავშირის კლიმატთან დაკავშირებულ მიზნებთან დაახლოებისთვის“ ფარგლებში, დასრულდა სამოქმედო გეგმის „კლიმატი 2021-2030“ გზამკვლევის შემუშავება.

ენერგეტიკის სფეროში ევროპული სტანდარტების დანერგვის უზრუნველსაყოფად, განხორციელდა შემდეგი ღონისძიებები: დამტკიცდა ელექტროენერგეტიკის სექტორში ერთიანი საბუღალტრო-სააღრიცხვო სისტემა, მიღებულ იქნა ელექტროენერჯის გადამცემ ქსელზე მიერთების სტანდარტული პირობები. გარდა აღნიშნულისა, ენერგეტიკის სფეროში ევროპული საუკეთესო პრაქტიკის დასაწერად ხორციელდება ევროკავშირის TWINNING-ის პროექტი.

## 5. ეკონომიკური თანამშრომლობა

წინასწარი შეფასებით, 2016 წლის შესაბამის პერიოდთან შედარებით, 2017 წლის ივნისში რეალური მთლიანი შიდა პროდუქტის ზრდის ტემპმა 4,6 პროცენტი, 2017 წლის II კვარტალის მთლიანი შიდა პროდუქტის საშუალო რეალურმა ზრდამ 4,0 პროცენტი, ხოლო 2017 წლის პირველი ექვსი თვის საშუალო რეალურმა ზრდამ 4,5 პროცენტი შეადგინა.<sup>1</sup>

წინასწარი მონაცემებით, საქართველოში განხორციელებული პირდაპირი უცხოური ინვესტიციების მოცულობამ 2017 წლის I კვარტალში 403.3 მლნ. აშშ დოლარი შეადგინა, რაც 2016 წლის I კვარტალის წინასწარ მონაცემებზე 3.7 პროცენტით მეტია (აქედან, 121.7 მლნ. აშშ დოლარი ევროკავშირის წევრ სახელმწიფოებზე მოდის).<sup>2</sup>

2017 წლის იანვარ-ივნისში, საქართველოს საგარეო სავაჭრო ბრუნვამ ევროკავშირის ქვეყნებთან 1304.1 მლნ. აშშ დოლარი შეადგინა, რაც წინა წლის შესაბამისი პერიოდის მაჩვენებელზე 11.0 პროცენტით მეტია. აქედან ექსპორტი 294,7 მლნ. აშშ დოლარი იყო (30,4 პროცენტით მეტი), ხოლო იმპორტი 1009.4 მლნ. აშშ დოლარი (6.4 პროცენტით მეტი). საქართველოს საგარეო სავაჭრო ბრუნვაში ამ ქვეყნების წილმა 27.0 პროცენტი შეადგინა, მათ შორის ექსპორტში 23.9 პროცენტი და იმპორტში 28.1 პროცენტი (2016 წლის იანვარ-ივნისში შესაბამისად 27.7, 23.8 და 28.8 პროცენტი). ევროკავშირის ქვეყნებზე მოდიოდა სავაჭრო დეფიციტის 30.3 პროცენტი (2016 წლის იანვარ-ივნისში 30.8 პროცენტი).<sup>3</sup>

2017 წლის პირველ ნახევარში, მომზადდა საკანონმდებლო ცვლილებების პაკეტი საქართველოს კანონმდებლობის ევროკავშირის შემდეგ საკანონმდებლო აქტებთან დაახლოების მიზნით:

- ❖ ევროკავშირის 2007 წლის დეკემბრის 2007/74/EC დირექტივა (დირექტივის მე-3 თავი) მგზავრთათვის რაოდენობრივი შეზღუდვების შესახებ;
- ❖ ევროკავშირის 1992 წლის 19 ოქტომბრის 92/83/EEC დირექტივა ალკოჰოლისა და ალკოჰოლური სასმელების აქციზის გადასახადის სტრუქტურის შესახებ (გარკვეულ საკითხებზე (განაკვეთების სტრუქტურა). ცვლილებები უკვე განხორციელდა და 2017 წლის 1 ივლისიდან შევიდა ძალაში, რომლის შესაბამისად, აქციზის გაანგარიშება მოხდება ლუდისათვის - სასმელში ალკოჰოლის პროცენტული მაჩვენებლის მიხედვით, ხოლო სპირტიან ალკოჰოლურ სასმელებზე აქციზის განაკვეთი დგინდება მასში სუფთა ალკოჰოლის შემცველობიდან გამომდინარე);
- ❖ საბჭოს 1986 წლის 17 ნოემბრის 86/560/EEC მეცამეტე დირექტივა (დამატებითი ღირებულების გადასახადის დაბრუნების შესახებ).

საქართველოს კანონმდებლობის საბჭოს 2006 წლის 28 ნოემბრის 2006/112/EC დირექტივასთან (დამატებითი ღირებულების გადასახადის (დღგ) საერთო სისტემის შესახებ) დაახლოების გაგრძელების მიზნით, 2017 წლის 1 იანვრიდან ამოქმედდა საქართველოს საგადასახადო

<sup>1</sup> [http://geostat.ge/cms/site\\_images/\\_files/georgian/economic/yovelTviuri\\_ekonomikuri\\_statistika\\_ivnisi.pdf](http://geostat.ge/cms/site_images/_files/georgian/economic/yovelTviuri_ekonomikuri_statistika_ivnisi.pdf)

<sup>2</sup> [http://geostat.ge/cms/site\\_images/\\_files/georgian/bop/FDI\\_2017Q1-GEO-with%20cover.pdf](http://geostat.ge/cms/site_images/_files/georgian/bop/FDI_2017Q1-GEO-with%20cover.pdf)

<sup>3</sup> წყარო: საქართველოს სტატისტიკის ეროვნული სამსახური

კოდექსის ცვლილებები წინასწარი გადახდების (ავანსების) დაბეგვრის საკითხზე. აღნიშნულ საკითხზე ცვლილებები შევიდა საქართველოს ფინანსთა მინისტრის №996 ბრძანებაში, რომლის საფუძველზე გადასახადის გადამხდელებს განემართათ ავანსების დღ-ით დაბეგვრის სხვადასხვა შემთხვევები.

საქართველოს კანონმდებლობის 2011 წლის 21 ივნისის საბჭოს 2011/64/EU დირექტივასთან (წარმოებული თამბაქოს აქციზის გადასახადის სტრუქტურისა და განაკვეთების შესახებ) დაახლოების მიზნით, 2017 წლის 1 იანვრიდან, განხორციელდა თამბაქოზე აქციზის განაკვეთების ზრდა, კერძოდ, აქციზის განაკვეთის ფიქსირებული კომპონენტი 60 თეთრით გაიზარდა.

ამოქმედდა სახელმწიფო აუდიტის სამსახურის ინოვაციური ვებპლატფორმა - ბიუჯეტის მონიტორი ([www.budgetmonitor.ge](http://www.budgetmonitor.ge)), რომელიც წარმოადგენს განახლებად ანალიტიკურ ინფორმაციას საჯარო ფინანსების მართვასთან დაკავშირებით და საშუალებას აძლევს ყველა დაინტერესებულ პირს ჩაერთოს სახელმწიფო ბიუჯეტის ზედამხედველობაში. ასევე, ამოქმედდა სახელმწიფო აუდიტის სამსახურის პოლიტიკური პარტიების ფინანსების ელექტრონული დეკლარირების პროგრამა.

2017 წლის აუდიტორული გეგმით განისაზღვრა 95 აუდიტი. ივლისის მდგომარეობით, დასრულდა 21 აუდიტი და მიმდინარეობს 32 ფინანსური/შესაბამისობის და 9 ეფექტიანობის აუდიტი. სახელმწიფო აუდიტის სამსახურის მიერ გაცემული რეკომენდაციების შესრულების ბოლო სამი წლის საშუალო მაჩვენებელი 49%-ია. აღნიშნული მაჩვენებლის გაუმჯობესებისა და რეკომენდაციების შედეგად მოტანილი სარგებლის გაზრდის მიზნით, მიმდინარეობს მონიტორინგის სისტემის დანერგვა და რეკომენდაციების შესრულების აუდიტები.

სტატისტიკის ეროვნულმა სამსახურმა შეიმუშავა საწარმოთა ზომის განსაზღვრის ახალი მეთოდოლოგია, რომელიც შეესაბამება საერთაშორისო სტანდარტებს. აქტიური საწარმოებისთვის ბიზნეს რეგისტრში განხორციელდა NACE Rev. 2 ასახვა. ბიზნეს სექტორის 2017 წლის პირველი კვარტლის შედეგები გამოქვეყნდა როგორც NACE Rev. 2 კლასიფიკატორის მიხედვით, ასევე - საწარმოთა ახალი ზომების მიხედვით.

საქართველოს კანონმდებლობის ევროპარლამენტისა და საბჭოს 2002 წლის 9 დეკემბრის 2002/92/EC სადაზღვევო მედიაციის შესახებ დირექტივასთან დაახლოების მიზნით, სადაზღვევო ბროკერების საქმიანობის საზედამხედველო ჩარჩოს სრულყოფის მიმართულებით, მომზადებულია „დაზღვევის შესახებ" საქართველოს კანონში ცვლილების შეტანის შესახებ" კანონპროექტის სამუშაო ვერსია.

## 6. თანამშრომლობის სხვა სფეროები

### 6.1 ტრანსპორტი

2017 წლის პირველ ნახევარში, საქართველოს კანონმდებლობის ძრავიანი ავტოსატრანსპორტო საშუალებებისა და მათი მისაბმელების გზისთვის ვარგისობის ტესტების შესახებ ევროპარლამენტისა და საბჭოს 2009 წლის 6 მაისის 2009/40/EC დირექტივასთან დაახლოების მიზნით, მომზადდა ტექნიკური რეგლამენტი, რომელიც შიდა სახელმწიფოებრივი პროცედურების გავლის შემდგომ წარედგინება მთავრობას დასამტკიცებლად.

2017 წლის 1 ივლისიდან ამოქმედდა „საქართველოს საჰაერო კოდექსში ცვლილების შეტანის შესახებ“ 2015 წლის 11 დეკემბრის №4620-ის საქართველოს კანონის შესაბამისი მუხლები, რომლის შედეგად განხორციელდა საქართველოს კანონმდებლობის ევროკავშირის შემდეგ საკანონმდებლო აქტებთან დაახლოება:

- ❖ უბედური შემთხვევებისას ავიაგადამზიდველის პასუხისმგებლობის შესახებ საბჭოს 1997 წლის 9 ოქტომბრის № 2027/97 რეგულაცია;
- ❖ ავიაგადამზიდველებისთვის და საჰაერო ხომალდის ოპერატორებისთვის სადაზღვევო მოთხოვნების შესახებ ევროპის პარლამენტისა და საბჭოს 2004 წლის 21 აპრილის № 785/2004 რეგულაცია;
- ❖ ევროკავშირის ტერიტორიაზე გადაზიდვების წარმოების წესის შესახებ ევროპარლამენტის 2008 წლის 24 სექტემბრის №1008/2008 რეგულაცია.

### 6.2 თანამშრომლობა ენერგეტიკის სფეროში

2017 წლის მაისში, საქართველო გახდა „ენერგეტიკული გაერთიანების“ სრულუფლებიანი წევრი.

1994 წლის 30 მაისის ევროპარლამენტისა და საბჭოს 94/22/EC დირექტივის „ნახშირწყალბადის რესურსების ძიების, მოპოვებისა და წარმოების ნებართვების მიღებისა და გამოყენების პირობების შესახებ“ შესაბამისად, მომზადებულია ნორმატიული აქტების ცვლილებების პროექტი.

2017 წლის პირველ ნახევარში, დასრულდა ენერგოეფექტურობის სამოქმედო გეგმის პროექტის შემუშავება და მიმდინარეობს საბოლოო განხილვები.

### 6.3 გარემოს დაცვა

2017 წლის 1 ივნისს, საქართველოს პარლამენტმა მიიღო „გარემოსდაცვითი შეფასების კოდექსი“, რომელიც სრულად შეესაბამება როგორც ევროკავშირის გარემოზე ზემოქმედების შეფასების და სტრატეგიული გარემოსდაცვითი შეფასების დირექტივებს, ასევე ტრანსსასაზღვრო კონტექსტში გარემოზე ზემოქმედების შეფასების შესახებ კონვენციას (ესპოს

კონვენცია), მის სტრატეგიული გარემოსდაცვითი შეფასების ოქმს და გარემოსდაცვით საკითხებთან დაკავშირებული ინფორმაციის ხელმისაწვდომობის, გადაწყვეტილებების მიღების პროცესში საზოგადოების მონაწილეობისა და ამ სფეროში მართლმსაჯულების საკითხებზე ხელმისაწვდომობის შესახებ კონვენციას (ორპუსის კონვენცია). კოდექსით გათვალისწინებული ძირითადი ვალდებულებები ამოქმედდება 2018 წლის 1 იანვრიდან.

საქართველოს კანონმდებლობის ევროპარლამენტისა და საბჭოს 2003 წლის 28 იანვრის 2003/4/EC საზოგადოების გარემოსდაცვით ინფორმაციაზე ხელმისაწვდომობის შესახებ დირექტივასთან დაახლოების მიზნით, გამოიცა საქართველოს გარემოსა და ბუნებრივი რესურსების დაცვის მინისტრის 2017 წლის 27 მარტის №12 ბრძანება „საქართველოს გარემოსა და ბუნებრივი რესურსების დაცვის სამინისტროს მიერ საჯარო ინფორმაციის პროაქტიულად გამოქვეყნების წესის, საჯარო ინფორმაციის ელექტრონული ფორმით მოთხოვნის სტანდარტისა და გარემოსდაცვით ინფორმაციაზე ხელმისაწვდომობის წესის დამტკიცების შესახებ“.

2017 წლის 25 მაისს, საქართველოს მთავრობამ დაამტკიცა ტექნიკური რეგლამენტი – ზოგიერთ თხევად საწვავში გოგირდის შემცველობის ზღვრული მნიშვნელობების დადგენის შესახებ, რომელიც შეესაბამება ევროპარლამენტისა და საბჭოს 2016 წლის 11 მაისის 2016/802 ზოგიერთ თხევად საწვავში გოგირდის შემცველობის შემცირების შესახებ დირექტივას.

ევროპარლამენტისა და საბჭოს 2004/35/EC გარემოსდაცვითი პასუხისმგებლობის შესახებ დირექტივის იმპლემენტაციის მიზნით, საქართველოს გარემოსა და ბუნებრივი რესურსების დაცვის მინისტრის 2017 წლის 9 თებერვლის №60 ბრძანებით, შეიქმნა გარემოსდაცვითი პასუხისმგებლობის სისტემის მარეგულირებელი სამართლებრივი აქტების მომზადებაზე პასუხისმგებელი სამუშაო ჯგუფი, რომელიც მუშაობს „გარემოსდაცვითი პასუხისმგებლობის შესახებ“ საქართველოს კანონის პროექტის და „გარემოსთვის მიყენებული ზიანის გამოთვლის მეთოდოლოგიის დამტკიცების შესახებ“ კანონქვემდებარე აქტის პროექტის დახვეწაზე და თანმდევი საკანონმდებლო პაკეტის შემუშავებაზე.

საქართველოს კანონმდებლობის ევროპარლამენტისა და საბჭოს 2010 წლის 24 ნოემბრის 2010/75/EU სამრეწველო ემისიების შესახებ დირექტივასთან (დებულება - ნარჩენების წვის ქარხნებისთვის გაფრქვევის ზღვრული ნორმების ლიმიტების დაწესება (ახალი დანადგარებისთვის) (მუხლი 30)) დაახლოების მიზნით, შემუშავდა კანონქვემდებარე აქტის პროექტი „ნარჩენების ინსინერაციისა და თანაინსინერაციის შესახებ“.

საქართველოს მთავრობის 2017 წლის №294 დადგენილებით დამტკიცდა ტექნიკური რეგლამენტი „სამედიცინო ნარჩენების მართვის შესახებ“.

2017 წლის პირველ ნახევარში შემუშავდა კლიმატის ცვლილებების მიმართ „ადაპტაციის ეროვნული გეგმის“ საგზაო რუკა.



## 6.4 სამოქალაქო დაცვა

მიმდინარეობს შესაბამისი პროცედურები საქართველოს ევროკავშირის სამოქალაქო დაცვის მექანიზმში ჩართვის მიზნით (EU Civil Protection Mechanism). ქართულმა მხარემ თანამშრომლობის პრიორიტეტული მიმართულებები მიაწოდა ევროკომისიის სამოქალაქო დაცვისა და ჰუმანიტარული დახმარების გენერალურ დირექტორატს (DG ECHO). ამჟამად, მიმდინარეობს მუშობა შეთანხმების ტექსტის პროექტზე.

## 6.5 სოფლის მეურნეობა და სასოფლო განვითარება

2017 წლის პირველი ხუთი თვის მონაცემებით, აგროდაზღვევის პროექტის ფარგლებში გაიცა **10,792 პოლისი**, დაზღვეული კულტურების ფართობმა შეადგინა 12,716 ჰექტარს.

2017 წლის პირველი ხუთი თვის მდგომარეობით, შეღავათიანი აგროკრედიტის პროექტის ფარგლებში გაიცა **879 სესხი**, აქედან 853 სესხი - 63,201,707 ლარის ოდენობით, 26 სესხი - 3,241,507 დოლარის ოდენობით.

გადამამუშავებელ საწარმოთა თანადაფინანსების პროექტით დაფინანსებულ ახალგახსნილ საწარმოებში დაინერგა სურსათის უვნებლობის მართვის საერთაშორისო სტანდარტების და სისტემების (HACCP და ISO22000:2005) თანამედროვე ტექნოლოგიები და მეთოდოლოგიები.

მიმდინარეობს სასოფლო-სამეურნეო პროდუქტების გადამამუშავებელი და შემნახველი საწარმოების თანადაფინანსების პროექტი. გადამამუშავებელ საწარმოთა კომპონენტის ფარგლებში, დამტკიცდა 5 პროექტი ჯამური ღირებულებით 4,257,803 ლარი და 2,594,788 აშშ დოლარი.

ხორციელდება სახელმწიფო პროგრამა - დანერგე მომავალი, რომლის ფარგლებშიც 176 ბენეფიციარს დაუმტკიცდა 186 განაცხადი. თანადაფინანსების ოდენობა შეადგენს 5,816,966 ლარს, გასაშენებელი ბაღების ფართობი - 1,061 ჰა-ს.

ასევე ხორციელდება სახელმწიფო პროგრამები სასოფლო-სამეურნეო კოოპერატივების მხარდაჭერის მიზნით.

## 6.6 დასაქმება, სოციალური პოლიტიკა და თანაბარი შესაძლებლობები

2017 წლის პირველ ნახევარში, სამუშაოს მაძიებელთა პროფესიული მომზადება-გადამზადებისა და კვალიფიკაციის ამაღლების სახელმწიფო პროგრამა ხორციელდება ქალაქ თბილისში და 14 მუნიციპალურ ერთეულში.

პირველადი ინფორმაციით, პროგრამაში ჩართულია 61 იძულებით გადაადგილებული პირი, 285 სოციალურად დაუცველი პირი და 33 შეზღუდული შესაძლებლობების მქონე (შშმ) პირი.

2017 წლის პირველ ნახევარში, 2016 წლის პროფესიული მომზადება-გადამზადების პროგრამის კურსდამთავრებულთა განმეორებითი მონიტორინგის შედეგად დადასტურდა დამატებით 126 ბენეფიციარის დასაქმება. ასევე 2016 წლის სტაჟირების კომპონენტის ფარგლებში 2017 წელს შრომითი ხელშეკრულება გაუფორმდათ სტაჟირების პროგრამის ფარგლებში ჩართულ კიდევ 18 სტაჟიორს.

2017 წლის „დასაქმების ხელშეწყობის მომსახურებათა განვითარების სახელმწიფო პროგრამის“ ფარგლებში, დამსაქმებლების მიერ წარმოდგენილი იქნა 2551 სამუშაო ადგილი, ვაკანსიების ფარგლებში შეირჩა და დამსაქმებლებთან გაიგზავნა 1010 სამუშაოს მაძიებელი. სულ საშუამავლო მომსახურების ფარგლებში დასაქმდა 217 პირი.

**დასაქმების ფორუმებში მონაწილეობა მიიღო 4747-მდე სამუშაოს მაძიებელმა.** წარმოდგენილი იყო 1500-მდე ვაკანასია, დასაქმდა 541 სამუშაოს მაძიებელი.

მოწყვლადი, დაბალკონკურენტუნარიანი ჯგუფების დასაქმების ხელშეწყობის მექანიზმების შემუშავება და დანერგვის ფარგლებში, მხარდაჭერითი დასაქმების კონსულტანტებმა მოიძიეს 115 ვაკანსია შშმ პირთათვის. მიმდინარე წელს, საშუამავლო მომსახურების ფარგლებში დასაქმდა 21 შშმ პირი.

დასაქმების ხელშეწყობის მომსახურებათა განვითარების პროგრამისა და სამუშაოს მაძიებელთა პროფესიული მომზადება-გადამზადებისა და კვალიფიკაციის ამაღლების სახელმწიფო პროგრამის ფარგლებში, 2017 წლის ივნისის მდგომარეობით, დასაქმებულია 923 სამუშაოს მაძიებელი, მათ შორის 35 შშმ პირი.

შრომის პირობების ინსპექტირების დეპარტამენტის მიერ მიმდინარე წლის პირველ 6 თვეში, შემოწმდა 105 კომპანიის 111 ობიექტი.

საქართველოს მთავრობის 2016 წლის 7 მარტის №112 დადგენილებით დამტკიცებული „იძულებითი შრომისა და შრომითი ექსპლუატაციის პრევენციისა და მათზე რეაგირების მიზნით სახელმწიფო ზედამხედველობის განხორციელების წესის“ შესაბამისად, შემოწმდა 81 კომპანია, მათ შორის არაგეგმიურად - 6.

**მომზადდა და 2017 წლის 1 ივნისს საქართველოს პარლამენტს წარედგინა საქართველოს კანონის პროექტი „შრომის უსაფრთხოების შესახებ“.**

შრომის ინსპექტორების კვალიფიკაციის ამაღლების მიზნით ჩატარდა ტრენინგები და სემინარები.

2017 წლის 10 თებერვალს გამართული სოციალური პარტნიორობის სამმხრივი კომისიის სხდომის მიერ მიღებული გადაწყვეტილების საფუძველზე, **დამტკიცდა მედიატორთა რეესტრი.**

## 6.7 ჯანმრთელობის დაცვა

ქრონიკული დაავადებების მქონე პირთათვის, რომლებიც რეგისტრირებულნი არიან „სოციალურად დაუცველი ოჯახების“ მონაცემთა ერთიან ბაზაში და მათზე მინიჭებული სარეიტინგო ქულა არ აღემატება 100 000-ს, ამოქმედდა ქრონიკული დაავადებების სამკურნალო მედიკამენტებით უზრუნველყოფის სახელმწიფო პროგრამა.

2017 წლის პირველ ნახევარში, დაავადებათა კონტროლისა და საზოგადოებრივი ჯანმრთელობის ეროვნული ცენტრი აღიარებულ იქნა ხმელთაშუა ზღვის ქვეყნების ეპიდემიოლოგიის სასწავლო პროგრამის (MediPIET) სასწავლო ცენტრად.

2017 წელს, დამტკიცდა „C ჰეპატიტის სკრინინგი“ - კლინიკური მდგომარეობის მართვის სახელმწიფო სტანდარტი (პროტოკოლი).

შიდსთან, ტუბერკულოზსა და მალარიასთან ბრძოლის გლობალური ფონდის მიერ დაფინანსებული მეთადონის ჩანაცვლებითი პროგრამები მიმდინარე წლის ივლისიდან სრულად უზრუნველყოფილია სახელმწიფოს მიერ.

სამედიცინო პერსონალისთვის შემუშავდა უწყვეტი სამედიცინო განათლების პროგრამები ინფექციების კონტროლისა და ანტიბიოტიკების რაციონალური გამოყენების შესახებ.

## 6.8 თანამშრომლობა ინოვაციის სფეროში

2017 წლის იანვარ-ივნისში, სსიპ საქართველოს ინოვაციების და ტექნოლოგიების სააგენტოს მიერ მცირე (5000 ლარამდე) საგრანტო პროგრამის ფარგლებში გაიცა 48 გრანტი, საიდანაც 17 გრანტი გაიცა პროტოტიპის დასამზადებლად, 20 - საზღვარგარეთ გასამართ ღონისძიებაში მონაწილეობის მისაღებად, 9 - საქართველოში გასამართი ღონისძიების ჩატარების უზრუნველსაყოფად და 2 - პატენტის მისაღებად.

## 6.9 თანამშრომლობა აუდიოვიზუალურ და მედიის სფეროებში

2017 წლის პირველ ნახევარში, საქართველოს კანონმდებლობის ევროპარლამენტისა და საბჭოს 2010 წლის 10 მარტის 2010/13/EU დირექტივასთან (აუდიოვიზუალური მედიის მომსახურებების დირექტივა) დაახლოების მიზნით, მომზადდა საკანონმდებლო ცვლილებების სამოქმედო გეგმა.

## 6.10 ხალხთა შორის კონტაქტები, განათლება, მეცნიერება, კულტურა, სპორტი და ახალგაზრდობა

2017 წლის პირველ ნახევარში, შემუშავდა „პროფესიული განათლების შესახებ“ საქართველოს ახალი კანონის პროექტი, რომელიც განხილულ იქნა დაინტერესებულ მხარეებთან. კანონპროექტი განთავსდა სამინისტროს ოფიციალურ ვებ-გვერდზე და ნებისმიერ პირს მიეცა

შესაძლებლობა საკუთარი შენიშვნები და წინადადებები მიეწოდებინა სამინისტროსათვის, რაც გათვალისწინებულ იქნა დოკუმენტის კორექტირებისას.

**საქართველო აქტიურად არის ჩართული ევროკავშირის პროგრამაში ERASMUS+ და 131 პარტნიორ ქვეყანას შორის პირველ ათეულშია, მე-8 ადგილით, წარმატებული პროექტების კუთხით.** 2017 წლის საგრანტო კონკურსის შედეგების მიხედვით, Erasmus+ პროგრამის ფარგლებში დაფინანსდა ინსტიტუციური თანამშრომლობის (CBHE/ex-Tempus) 5 ახალი პროექტი ქართული უნივერსიტეტების მონაწილეობით, გაიზარდა Erasmus Mundus Joint Master Degree Programmes პროგრამებში ქართველი აპლიკანტების რაოდენობა: 21-მა სტუდენტმა მოიპოვა სტიპენდია ერთობლივ სამაგისტრო პროგრამებზე. დაფინანსდა ჟან მონე-ს ერთი ახალი პროექტი. 2017 წლის პირველი ნახევრის მონაცემებით, საერთაშორისო კრედიტ მობილობის მიმართულებით მიღებული სტიპენდიების რაოდენობა შეადგინა 1333.

2017 წლის 17 იანვარს, გაიმართა საერთაშორისო კონფერენცია "მარი სკლოდოვსკა კიურის აქტივობები". ჩატარდა 7 საინფორმაციო დღე ჯანმრთელობის, ენერგეტიკის, საინფორმაციო ტექნოლოგიების, ბიოტექნოლოგიების და მარი სკლოდოვსკა-კიურის აქტივობების შესახებ, ამოქმედდა სპეციალური სამუშაო ჯგუფი, განათლებისა და მეცნიერების სამინისტროს ოფიციალური პირების, შოთა რუსთაველის ეროვნული სამეცნიერო ფონდის, საქართველოს უმაღლესი საგანმანათლებლო დაწესებულებების, სამეცნიერო-კვლევითი ინსტიტუტებისა და საქართველოს ინოვაციებისა და ტექნოლოგიების სააგენტოს წარმომადგენლების ჩართულობით, რომლის მიზანია, ცენტრალურ და საუნივერსიტეტო დონეზე, საუკეთესო საერთაშორისო პრაქტიკაზე დაფუძნებული მხარდამჭერი სერვისების მიწოდება, საქართველოს ევროკავშირის კვლევისა და ინოვაციის ჩარჩო პროგრამის „ჰორიზონტი 2020“ კონკურსებში მონაწილეობის ხელშეწყობის მიზნით.

**ევროკავშირის კვლევისა და ინოვაციის ჩარჩო პროგრამის „ჰორიზონტი 2020“ ფარგლებში, 2017 წელს გამოცხადებულ კონკურსებში გაიმარჯვა ორმა პროექტმა ქართველი პარტნიორების მონაწილეობით.** ქართულმა ორგანიზაციებმა, ევროკომისიისგან ჯამში 390,000 ევროს დაფინანსება მიიღეს.

2017 წელს, კომპანია მაიკროსოფტთან გაფორმებული ხელშეკრულების ფარგლებში, **უსადენო ინტერნეტის ქსელი (WiFi) მოეწყო 32 საჯარო სკოლაში.**

**შშმ და სპეციალური საგანმანათლებლო საჭიროების მქონე (სსსმ) პირებისათვის გაუმჯობესდა წვდომა საგანმანათლებლო სისტემის სხვადასხვა საფეხურზე.** პროფესიული საგანმანათლებლო პროგრამების განმახორციელებელ სახელმწიფო საგანმანათლებლო დაწესებულებებში ჩაირიცხა 91 სპეციალური საგანმანათლებლო საჭიროების მქონე პირი, პროფესიულ სასწავლებლებში ჩაირიცხა 85 სპეციალური საგანმანათლებლო საჭიროების მქონე პირი აბიტურიენტი.

შემუშავებულია ახალი კანონის პროექტი „ფიზიკური აღზრდისა და სპორტის შესახებ“, რომელშიც გათვალისწინებულია სპორტული ორგანიზაციების და სახელმწიფო უწყებების წინადადებები. ასევე, შემუშავებულია მასობრივი სპორტის განვითარების პროგრამა და დაწყებულია სამოქმედო გეგმაზე მუშაობა.

2017 წლის პირველ ნახევარში, დაფუძნდა სსიპ „შემოქმედებითი საქართველო“ და შეიქმნა ინდუსტრიების განვითარების უწყებათაშორისი თანამშრომლობის გეგმა.

2017 წლის პირველ ნახევარში, პროგრამის „შემოქმედებითი ევროპა“ ფარგლებში, დაფინანსდა 5 პროექტი საქართველოდან:

- ❖ CineDoc-თბილისის საერთაშორისო დოკუმენტური კინოს ფესტივალი 2017 - Nosfera Foundation NNLE;
- ❖ Brave Kids Artistic Instructor Training and Practical Dissemination Project - საქველმოქმედო ფონდი "Caritas Georgia" და სამცხე-ჯავახეთის რეგიონული ასოციაცია „ტოლერანტი“;
- ❖ School of Film Agents - დემოკრატიული ცვლილებების ინსტიტუტი;
- ❖ Mosaïque de la littérature Européenne - გამომცემლობა „აგორა“;
- ❖ First time in Georgia: 10 EU Literature Prize winners - „ელფის“ გამომცემლობა.

2017 წელს, კულტურის სექტორში შემუშავდა თემატური და დარგობრივი სტრატეგიული ხასიათის შემდეგი დოკუმენტები:

- ❖ კულტურულ და შემოქმედებით ცხოვრებაში შეზღუდული შესაძლებლობის მქონე პირთა თანაბარი მონაწილეობის უზრუნველყოფის გზამკვლევი;
- ❖ საქართველოს ოკუპირებულ ტერიტორიებზე არსებული კულტურული მემკვიდრეობისა და ფასეულობების დაცვის/პოპულარიზაციის სამოქმედო გეგმა;
- ❖ საგანგებო სიტუაციების დროს კულტურული მემკვიდრეობის უძრავი და მოძრავი ობიექტების დაცვისა და საგანგებო მართვის სამოქმედო გეგმა;
- ❖ საზღვარგარეთ არსებული ქართული კულტურული მემკვიდრეობისა და ქვეყანაში არსებული ე.წ. „ზიარი“ კულტურული მემკვიდრეობის მოვლა-პატრონობასთან, შესწავლასა და პოპულარიზაციასთან დაკავშირებულ საკითხებზე მომუშავე უწყებათაშორისი სამუშაო ჯგუფის სამოქმედო გეგმა.

## 6.11 რეგიონული განვითარება

წარმატებით ხორციელდება 2015-2017 წლების რეგიონული განვითარების პროგრამა. მომზადდა აღნიშნული პროგრამის განხორციელების 2016 წლის კონსოლიდირებული ანგარიში.

## 7. ფინანსური დახმარება, თაღლითობის წინააღმდეგ ბრძოლა და კონტროლი

ჩატარდა აქტიური კონსულტაციები ევროკავშირის 2017-2020 წლების ევროკავშირის დახმარების ერთიანი ჩარჩო დოკუმენტის მომავალი თანამშრომლობის პრიორიტეტების განსაზღვრასთან დაკავშირებით.

2017 წლის 5 მაისს, საქართველოსა და ევროკავშირს შორის ხელი მოეწერა საფინანსო შეთანხმებას, რომელიც ითვალისწინებს ასოცირების შეთანხმების იმპლემენტაციის პროცესში 32 მლნ. ევროს ოდენობის ევროკავშირის საექსპერტო და ტექნიკური დახმარების გამოყოფას.

ჩატარდა კონსულტაციები ევროკავშირის თაღლითობასთან ბრძოლის ოფისთან (OLAF), ასოცირების შეთანხმების მე-VII კარის (თაღლითობის წინააღმდეგ მიმართული დებულებები) იმპლემენტაციის ფარგლებში, საქართველოში შესაბამისი სისტემის ჩამოსაყალიბებლად, როგორც ინსტიტუციონალურ, ასევე საკანონმდებლო დონეზე.

2017 წლის 29-30 ივნისს, განხორციელდა OLAF-ის გენერალური დირექტორის ჯოვანი კესლერის ვიზიტი საქართველოში, რომელმაც შეხვედრები გამართა ყველა შესაბამისი უწყების ხელმძღვანელთან, ხოლო 17-18 ივლისს, საქართველოს შესაბამისი უწყებებისგან დაკომპლექტებული დელეგაცია იმყოფებოდა ქ. ბრიუსელში, სადაც გაიმართა ორმხრივი კონსულტაციები OLAF-ის და ბელგიის თაღლითობასთან ბრძოლის ოფისის (AFCOS) წარმომადგენლებთან.

## 8. ინსტიტუციური თანამშრომლობა

### 8.1 ინსტიტუციური ჩარჩო

2017 წლის 22 ივნისს, ქ. თბილისში გაიმართა საქართველო-ევროკავშირის ასოცირების კომიტეტის მესამე სხდომა. კომიტეტის სხდომაზე განხილულ იქნა საქართველოსა და ევროკავშირს შორის ეკონომიკური და დარგობრივი თანამშრომლობის გაღრმავების პერსპექტივები, მათ შორის ისეთ სფეროებში, როგორცაა ტრანსპორტი, ენერჯეტიკა, გარემოს დაცვა, სოფლის მეურნეობა, რეგიონული განვითარება, დასაქმება და სოციალური პოლიტიკა, მეცნიერება, განათლება და კულტურა.

2017 წლის 17 მაისს, ქ. თბილისში გაიმართა საქართველო-ევროკავშირის მართლმსაჯულების, თავისუფლებისა და უსაფრთხოების საკითხებზე ქვეკომიტეტის მესამე სხდომა.

2017 წელს, გაიმართა საქართველო-ევროკავშირის ასოცირების ეკონომიკური და დარგობრივი თანამშრომლობის ქვეკომიტეტის თემატური ჯგუფების სხდომები:

- ❖ 2017 წლის 16 მარტს, ქ. თბილისში გაიმართა თემატური ჯგუფის „სოფლის მეურნეობა და სასოფლო განვითარება; მეთევზეობა და საზღვაო მმართველობა; რეგიონული განვითარება, თანამშრომლობა საზღვრისპირა და რეგიონულ დონეზე“ მეორე სხდომა;
- ❖ 2017 წლის 17 მარტს, ქ. თბილისში გაიმართა თემატური ჯგუფის „თანამშრომლობა საინფორმაციო საზოგადოების სფეროში; თანამშრომლობა აუდიოვიზუალურ და მედიის სფეროებში; თანამშრომლობა კვლევის, ტექნოლოგიების განვითარებისა და დემონსტრირების სფეროში; განათლება, ტრენინგი და ახალგაზრდობა; კულტურის სფეროში თანამშრომლობა; თანამშრომლობა სპორტისა და ფიზიკური აქტივობის სფეროში“ მეორე სხდომა;
- ❖ 2017 წლის 28 მარტს, ქ. ბრიუსელში გაიმართა თემატური ჯგუფის „დასაქმება, სოციალური პოლიტიკა და თანაბარი შესაძლებლობები; საზოგადოებრივი ჯანდაცვა“ მეორე სხდომა;
- ❖ 2017 წლის 29 ივნისს, ვიდეო კონფერენციის მეშვეობით გაიმართა თემატური ჯგუფის „სამრეწველო და საწარმოების პოლიტიკა და სამთო-მოპოვებითი საქმიანობა; ტურიზმი; კორპორაციული სამართალი და კორპორაციული მმართველობა; მომხმარებელთა პოლიტიკა; საგადასახადო პოლიტიკა“ მეორე სხდომა.

### 8.2 სტრატეგიული კომუნიკაცია

ევროპულ და ევროატლანტიკურ სტრუქტურებში ინტეგრაციის საკითხებში საქართველოს სახელმწიფო მინისტრის აპარატის ინიციატივითა და სამოქალაქო საზოგადოების აქტიური ჩართულობით, შემუშავდა და მიმდინარე წლის 13 აპრილს, საქართველოს მთავრობის მიერ დამტკიცდა „ევროკავშირისა და ნატოში საქართველოს გაწევრების კომუნიკაციის შესახებ საქართველოს მთავრობის სტრატეგია 2017-2020 წლებისთვის“. შესაბამისად, განახლდა

ევროკავშირში გაწევრიანების საკითხებზე კომუნიკაციის პოლიტიკა და სტრატეგიას დაემატა ნატოში გაწევრიანების საკითხებზე კომუნიკაციის ელემენტი. ამასთან, შემუშავდა აღნიშნული სტრატეგიის 2017 წლის სამოქმედო გეგმა.

2017 წლის თებერვლიდან **ხორციელდება ევროკავშირთან სავიზო რეჟიმის ლიბერალიზაციის საკითხებზე საინფორმაციო კამპანიის მეორე ფაზა**. საინფორმაციო კამპანია მოიცავს მრავალ აქტივობას კომუნიკაციის სხვადასხვა საშუალებებით. კამპანიის ფარგლებში ტარდება შეხვედრები, ტრენინგები და სემინარები სხვადასხვა სამიზნე ჯგუფებთან. ინფორმაცია ითარგმნება და ვრცელდება ქართულ და ეთნიკური უმცირესობების ენებზე (აფხაზური, ოსური, აზერბაიჯანული, სომხური და რუსული). ამასთან, დაგეგმილია საქართველო-ევროკავშირის უვიზო მიმოსვლასთან დაკავშირებული კამპანიის მესამე ფაზის განხორციელება.

2017 წლის 13-14 ივლისს, ქ. ბათუმში გაიმართა მე-14 საერთაშორისო კონფერენცია „საქართველოს ევროპული გზა - რეგიონული სტაბილურობის უზრუნველყოფა“. კონფერენციაში მონაწილეობა მიიღო ევროკავშირისა და „აღმოსავლეთ პარტნიორობის“ წევრი ქვეყნების, ევროკავშირის ინსტიტუტების, საქართველოს აღმასრულებელი და საკანონმდებლო ხელისუფლების, არასამთავრობო ორგანიზაციებისა და ბიზნეს წრეების 400-ზე მეტმა წარმომადგენელმა.

### **8.3 სამოქალაქო საზოგადოებასთან თანამშრომლობა**

ასოცირების შესახებ შეთანხმებისა და ასოცირების დღის წესრიგის განხორციელების 2017 წლის სამოქმედო გეგმის შემუშავების პროცესში აქტიურად იყვნენ ჩართულნი „აღმოსავლეთ პარტნიორობის“ სამოქალაქო საზოგადოების ფორუმის საქართველოს ეროვნული პლატფორმის წევრი არასამთავრობო ორგანიზაციებისა და ფონდი „ღია საზოგადოება საქართველოს“ ასოცირების შესახებ შეთანხმების განხორციელების მონიტორინგის ჯგუფის წარმომადგენლები. მათ მიერ წარმოდგენილი რეკომენდაციების მნიშვნელოვანი ნაწილი გათვალისწინებულ იქნა 2017 წლის ეროვნული სამოქმედო გეგმის პროექტში. ამასთან, სამოქალაქო საზოგადოების წარმომადგენლები ჩართულნი იყვნენ საქართველო-ევროკავშირის 2017-2020 წლების ასოცირების დღის წესრიგთან დაკავშირებით ქართული მხარის პოზიციის შემუშავებაში.